

附件二

113 年全國語文競賽臺灣客語朗讀文章國小學生組（海陸腔）

編號 2 號

【蝠婆仔】許倩雯原作

歸百隻蝠婆仔，像燥絲絲个鹹菜乾，一皮一皮倒吊在窿肚个壁頂。日頭落山，天色暗下來，頭那生到像老鼠樣个蝠婆仔睡醒咧！翼被掀仔¹，陣打陣个對窿肚飛出來絡食。暗青色个天天頂，就像分人委²了麻仔，一下仔斯烏麻戰笠³。

蝠婆仔實在慶！在暗晡頭飛到恁遠，也毋識看著佢撞著麼个東西，連細條个電線也閃得過。你定著話著蝠婆仔个目珠當利係無？其實毋係，蝠婆仔係用「聲」來定位个。佢兜會發出个耳空聽毋著个高頻聲，這聲像海湧樣打出去，堵著東西就會彈轉來。蝠婆仔就用應聲，算準東西个距離摺大細；也用應聲，尋著食物。

一直話著蝠婆仔戴在山窿抑係石窟肚。該日，兩兄弟在棚頂搞，手賤，拿等球仔就開始相擲。無想著無擲準，嘎摺天蓬个枋仔擲一隻空。兩兄弟臥頭看看等該隻空仔，毋知愛仰結煞正好！忽然間，三隻烏疏疏个東西，對空肚鑽出來，翼啪啪滾个在間房飛

¹ 翼被掀仔：音 rhid' pia' pia' er；形容雙翅拍動時開合的樣子。

² 委：音 ve+；搗、撇。

³ 烏麻戰笠：音 vu' ma zhan' dad；形容數量極多。

來飛去。這聲實在得人驚！嚇到細老弟噉噉滾喊：「噉……噉……噉血鬼來咧！」佢遽遽用手保護等頸根，嚇到鑽落眠床下毋敢出來。膽大个阿哥緊拚拚仔擎起掃把開始亂拂⁴，想愛摺蝠婆仔打下來！

阿婆聽著聲，行上樓頂，大聲喊：「拜託哪！掃把摺佢放下來！莫恁哀過，蝠婆仔會分你打死！」續等又講：「正經電視看忒多咧，毋讀書。臺灣个蝠婆仔哪會啖人个血，蝠婆仔飛落屋肚係當好个占頭！」

阿婆打開窗門分蝠婆仔飛出去，再過帶等孫仔去看佢間房該頂紅眠床，眠床个架仔頂正經刻有蝠婆仔个圖像。阿婆又喊老弟摺頸根戴个玉撈出來分大家看，也刻有蝠婆仔个造型。眠床个架仔頂，刻有五隻蝠婆仔，安到「五福臨門」；玉町刻一隻桃仔摺蝠婆仔，表示「福壽延年」。原來西方人摺蝠婆仔看做係鬼怪个化身，毋過事追求吉祥个中國人，係摺蝠婆仔看做福氣个象徵！

日頭出現在東片析个山頭，臨天光咧！三隻飛出去个蝠婆仔，又對屋簷下鑽落來，福氣光臨家門咧！

⁴ 拂：音 fin'；揮動。